

KERATAN AKHBAR

TARIKH : 1 JUN 2023
AKHBAR : BERITA HARIAN
MUKA SURAT : 28

Kerajaan yakin prospek pertumbuhan ekonomi

Bisnes

1 Jun 2023
bbbiz@ustp.com.my

Ikuti lebih berita di www.bharian.com.my

Kerajaan yakin prospek pertumbuhan ekonomi

Malaysia kekal berhati-hati perkembangan luaran tidak menentu

Oleh Mahanum Abdul Aziz
mahanum_aziz@bh.com.my

Kerajaan akan kekal berhati-hati dengan perkembangan luaran yang tidak menentu, namun optimis dengan prospek pertumbuhan keseluruhan dan jangka panjang ekonomi negara, menurut Menteri Ekonomi, Rafizi Ramli.

Beliau berkata, ketidaktentuan luaran ketika ini terutama berikutan isu persetujuan mengenai had siling hutang kerajaan Amerika Syarikat (AS) menjejaskan prestasi ringgit berbanding dolar AS.

Namun, beliau tidak melihat situasi memabihkan had hutang AS akan berpanjangan terlalu lama dan isu itu perlu diselesaikan oleh kerajaan AS.

"Pandangan saya, seperti yang saya ulang berkali-kali, ada perkara yang di luar kawalan (kita) dan ada perkara dalam kawalan kita dalam kita menguruskan ekonomi. Yang penting adalah kita ambil perspektif keseluruhan mengenai prestasi ekonomi.

"Prestasi keseluruhan kita termasuk dari segi perkembangan dan pertumbuhan ekonomi dari suku ke suku dan prestasi inflasi.

"Pertumbuhan ekonomi pada suku pertama sebanyak 5.6 peratus dan lebih baik daripada jangkaan. Inflasi juga turun selama 11 bulan berturut-turut dan pada April ia turun kepada 3.3 peratus. Kami yakin ia (inflasi) akan terus turun," katanya.

Beliau berkata demikian pada sidang media pasca mesyuarat Pasukan Petugas Khas Pemudahcara Perniagaan (PEMUDAH) di Putrajaya, semalam.

Rafizi juga tidak menolak bahawa negara tidak akan terlepas daripada terkena tempas ketidaktentuan luaran dari semasa ke semasa.

Justeru, beliau berkata, adalah lebih baik melihat kepada perspektif keseluruhan dan jangka panjang ekonomi.

Katanya, apabila ketidaktentuan di AS reda, pasaran akan menjadi normal, sekali gus akan mencerminkan asas ekonomi negara.

Harap tekanan kurang

Sementara itu, Timbalan Menteri Kewangan I, Datuk Seri Ahmad Maslan, berkata kerajaan berharap tekanan terhadap ringgit berbanding dolar AS ketika ini dapat dikurangkan apabila isu memabihkan siling hutang kerajaan AS dapat diselesaikan dalam tempoh beberapa hari akan datang.

Beliau berkata, berita terkini melaporkan bahawa kerajaan AS cuba untuk menyelesaikan isu siling hutang negara itu secepat mungkin.

Katanya, Presiden AS, Joe Biden ada menyebut bahawa pen-

tadbirannya cuba menyelesaikan perkara ini sebelum 5 Jun ini, iaitu tinggal beberapa hari sahaja lagi.

"Kita harap apabila perkara ini selesai maka ringgit, tidak seperti apa yang berlaku pada hari ini. Saya tidak boleh bercerita lebih daripada itu, kita tunggu perkembangan lima ke enam hari lagi, supaya apa yang berlaku di AS dapat diselesaikan secepat mungkin.

"Apa yang disebutkan oleh Pengerusi SC (Suruhanjaya Sekuriti Malaysia) dalam mesyuarat bersama saya tadi (semalam), sekarang ini, pelabur dan mereka terbahat dalam perniagaan memegang dolar AS apabila berlaku 'stalemate' (kebuntuan) mengenai siling hutang di AS.

"Namun apabila siling hutang itu boleh ditingkatkan, maka pegangan dan permintaan terhadap dolar AS akan berkurangan, menyebabkan tukaran asing antara ringgit dan dolar AS akan berkurangan sekali gus melegakan tekanan terhadap ringgit. Kita harap begitu dalam lima hari dari sekarang," katanya pada sidang media sempena lawatan rasmi ke SC di Kuala Lumpur, semalam.

Menurut laporan media antarabangsa, siling hutang AS telah dilanjutkan ke tarikh akhir baharu pada 5 Jun ini sebelum negara itu berdepan kemelut kehabisan wang jika had hutang tidak dinaikkan.

Inflasi juga turun selama 11 bulan berturut-turut dan pada April ia turun kepada 3,3 peratus. Kami yakin ia (inflasi) akan terus turun

Rafizi Ramli, Menteri Ekonomi